

野

獲

編

野獲編卷二目錄

宮闈

修女戒

母后聖製

國初納妃

天家生母不同

列朝貴妃姓氏

帝王娶外國女

高麗女見疑

故后無諱日

母后在位久

宣宗廢后

封妃異典

帝后祔葬

廢后加禮

英宗重夫婦

英宗敬妃喪禮

景帝廢后

皇朝通志 卷三十一
景皇后壽考

憲宗廢后

孝宗生母

萬貴妃

謝韓二公論選妃

鄭旺妖言

頒行女訓

母后諡號

世宗廢后

皇后祔廟之禮

孝烈祔廟

母后減諡

莊肅后喪禮

嘉靖兩后喪禮

母后先祔廟

親蠶禮

李氏再貢女

聖母並尊

兩宮同在位久

今上篤厚中宮

恭妃進封

郊寺保釐

今上家法

東宮妃號

王妃殉節

宮人姓名

文臣賜官婢

野獲編卷三

秀水沈德符景倩著 桐鄉錢 枋爾載輯

宮闈

修女戒

洪武元年三月朔命翰林儒臣修女戒謂學士朱升等曰后妃雖母儀天下然不可使預政事至於嬪嬙之屬不過備職事侍巾櫛若寵之大過以驕恣犯分觀歷代宮闈政由內出鮮有不爲禍亂者卿等爲我纂述女戒及古賢妃事可爲法者使子孫知所持守上之立法直追三代故列聖以來不第后妃專司陰教卽以英廟及

今上沖聖御宇長樂居尊惟保護皇躬未曾預聞一政
詒謀遠矣使宋祖以此示戒則元祐時宣仁后之謗何
自而興

母后聖製

本朝仁孝皇后著內訓又有女誠至章聖皇太后又有
女訓今俱刻之內府頒在宇內今上聖母慈聖皇太后
所撰述女鑑一書尤爲詳明典要主上親灑宸翰序之
真宮闈中盛事也然聖製又不止此今文華殿後殿所
懸扁凡十二字每行二字共分六行其文曰學二帝三
王治天下大經大法乃慈聖御筆臣下但見龍翔鳳翥

結構波磔之妙以爲今上御書而實非也古來惟宋宣
仁皇后善飛白大書然不過一二字豈如慈聖備得八
法精蘊哉眞天人也

國初納妃

高皇帝提一劍芟羣雄於所平諸國妃主無選入侍者
惟僞漢違命最久上心恨之曾納其妾旋卽遣出深以
爲悔野史訛傳爲曾生潭王梓復叛誅不知潭王與齊
王博同爲達定妃所生自坐犯家事自焚初不叛亦不
受誅也惟第十四女含山公主母妃韓氏係高麗人考
遼簡王母妃亦韓氏但不知與含山同產否無所証據

不敢臆斷公主以洪武十三年生二十七年下降駙馬
尹清永樂間進長公主洪熙初進大長公主至天順六
年方薨年八十三於太祖位下二十五子十六女中最
爲壽考然則高麗貢女不始于文皇時光祿權永均等
諸女也○天順五年七月上致書舍山大長公主云高
皇祖所生惟祖姑享高壽誠爲難得近者承諭用度有
缺朕心惻然特遣太監藍忠賫送珠翠九翟博鬢冠一
頂白金三百兩鈔一萬貫紵紗羅各十足生熟絹三十
疋以表親親之義按博鬢惟皇后得用之國初王妃亦
許用永樂間革之親藩曾有請而不許今特以賜舍山

蓋異數也

天家生母不同

高皇帝貴妃孫氏以洪武七年薨上以妃無子主喪命
吳王橚認爲慈母治後事服斬衰三年一如孝慈錄中
生母之例橚後改封周王高后嫡出也嘉靖三十四年
肅皇帝第三女寧安公主將下降駙馬李和以母妃先
薨命拜皇貴妃沈氏爲慈母出閣醮戒謝辭諸儀一同
生母及和與公主成婚後入謁皇貴妃賜宴宮中尤多
異數一則無子而子一則無女而女孰非聖主異恩哉
至有不幸而反是者如嘉靖三十三年康妃杜氏薨則

穆宗生母也禮官請復三年喪上不許又引孫貴妃故事亦不從且以應避至尊不宜重服下諭大臣遂不敢爭且自穆宗就裕邸後生不得見沒不得訣亦可悲矣又如孝宗爲淑妃紀氏出自離母腹卽爲萬貴妃所妬妃出居內安樂堂迨孝宗六齡始得見父皇而淑妃旋以暴薨報憲宗亦不敢詰孝宗龍飛徧覓母家宗族幾十年終不可得兩妃爲兩朝聖主所託體他日雖備享尊崇祔葬山陵而所遭屯剝乃爾天耶人耶意者運數正然特假手至尊耶

列朝貴妃姓氏

內廷嬪御尊稱至貴妃而極先朝拜此秩者歷歷可數

高皇帝朝有貴妃孫氏諡成穆文皇帝朝有貴妃張氏
諡昭懿貴妃王氏諡昭獻昭皇帝朝有貴妃郭氏諡恭
肅章皇帝朝則孝恭后亦曾先拜且特加皇字旋位中
宮不敢並紀嗣後則有賢妃何氏贈貴妃諡端靖然而
不得皇字矣睿皇帝朝則孝肅后亦曾拜不敢並紀純
皇帝朝則有皇貴妃萬氏諡恭肅端順榮靖爲宮妃六
字諡之始而宸妃邵氏進封貴妃是生興獻帝後稱孝
惠后不敢並紀肅皇帝朝則有皇貴妃王氏諡端和恭
順溫僖皇貴妃閻氏諡榮和惠順端僖皇貴妃沈氏諡

莊順安榮貞靜其諡號皆用憲宗萬妃例也莊皇帝朝則有皇貴妃李氏卽今慈聖皇太后不敢並紀今上則有今東宮母妃及敬妃追封皇貴妃李氏諡恭順榮莊端靖及今翊坤宮鄭氏蓋列帝十二朝歷年二百五十而得此號者僅十六位內二位猶非生拜然二祖及仁宗朝尙未有皇字故有冊而無寶世宗時閩王兩妃未聞殊寵特以儲宮之重驟得峻加而賢妃柏氏在憲宗朝曾育悼恭太子竟不得封蓋軒龍副貳不輕授如此然柏妃至嘉靖六年薨距生悼恭時已五十九年雖齋於遇而豐於壽矣○孝惠邵后封貴妃時有冊又有寶

矣而不加皇字意者同封者共十八不欲太軒輊耶是
不可曉嘉靖四十五年八月甲子進封敬妣文氏爲貴
妃時去上六十聖誕僅三日耳然封號內無皇字故止
用金冊無寶此則近代未有姑附紀之

帝王娶外國女

太祖第二子秦愍王以洪武四年娶故元太傅中書右
丞相河南王擴廓帖木兒女王氏爲正妃至二十八年
愍王薨王妃以死殉遂得合葬而次妃鄧氏則功臣清
河王愈女反屈居其下同時洪武廿一年戊辰科狀元
爲襄陽人任亨泰其妻本蒙古人賜國姓朱氏而亨泰

母爲烏古論氏亦色目人也又文皇帝納高麗所獻女數人其中一人爲賢妃權氏侍上北征回師薨於嶧縣遂藁葬焉賢妃父拜光祿卿仍居高麗是時尚仍元俗未禁屬國進女口也此後遂不聞此事矣後正德間回回人於永上言高麗女白皙而美大勝中國因并取色目侯伯及達官女入內蓋亦有所本○古來中國娶胡婦者如魏文帝悼后郁久閹氏爲蠕蠕主阿那瓌長女文帝至廢元配乙弗后納之復以悼后妬賜乙弗死阿那瓌次女又爲齊神武后神武每因事跪拜蓋皆仰其鼻息以爲盛衰及突厥滅蠕蠕其強盛倍于往時宇文

與高氏爭衡倚以爲援共求其女終爲周所得藉以滅齊則唐詩所云安危託婦人者又不在和親之公主矣我朝英宗北狩也先欲進其妹上堅拒之迄不能強聖主英概處困不撓奚止雪恥酬百王也

高麗女見疑

洪武十三年高麗愆貢期上賜詔詰責之旣而彼國遣使周誼來計事上勅遼東都指揮使司曰高麗朝貢違約朕拘其使後縱之歸乃復懷詐令誼作行人非有謀而何前元庚申君曾納誼女於宮中庚申君出奔內臣得此女以歸今高麗數遣誼來使殊有意焉卿不可不

備勅至當遣誼來京別有以處之及周誼至京署本國
銜爲禮曹判書上賜以襲衣遣通事先歸留誼于京師
仍命邊將自今入境者皆止於邊不許入見雖有貢賦
亦不許入獻蓋終以女在宮爲疑聖主之嚴防女戎如
此又安得褒女驪姬之禍乎

故后無諱曰

太后呂氏故懿文太子追崇興宗康皇帝之繼配也太
子娶開平王常遇春女爲妃先薨以太常卿呂本女爲
繼建文帝卽位追尊常氏爲懿敬孝康皇后呂爲皇太
后及文皇兵入召后至告以不得已舉兵之意后出宮

復故號爲太子妃尋命懿文諸子吳王爲廣澤王居漳
州衡王爲懷恩王居建昌是年俱召還錮之鳳陽高牆
惟少子允熾先封徐王改封敷惠王隨母呂太妃居懿
文陵園永樂四年火起於邸中暴卒迫諡哀簡蓋以呂
后生不欲顯誅之也自此呂后遂不知所終今紀述中
有云與建文同日自焚者妄也今懿文園近附孝陵歲
時尚能沾祭常呂二后想亦並祔不廢然呂后竟無諱
日可攷亦無諡號追贈雖大義滅親然於文皇爲長嫂
于仁宗爲伯妣恩禮缺然可爲歎息今志士仁人徒致
意於建文尊號屢形章奏尙未循其本也嘉靖間孝宗

張后崩追諡孝康與懿文帝后號同此大臣不討論之
過時貴溪首揆分宜掌禮部

母后在位久

本朝母后如仁宗誠孝后張氏以中宮擁立宣英兩朝
進稱皇太后太皇太后而在位止十八年宣宗孝恭后
孫氏稍久正位中宮及太后三十一年英宗之孝肅周
后稱太后太皇太后共四十一年爲更久然在成化初
以憲宗生母從貴妃崇進者惟憲宗之孝貞王后以中
宮擁立孝武兩朝稱太后太皇太后共五十五年最尊
且壽所微恨者聖主非所出耳至若孝宗之孝康張后

專寵椒宮古今無匹且誕育毅皇爰立肅皇享天下養
前後亦五十五年可稱備福然在正德間已擁虛位嘉
靖間以章聖之故開罪主上禍延二弟憂撓憔悴不復
可堪何如早從敬皇上仙之樂人有以壽爲戚者帝后
且然況下此者乎

宣宗廢后

初宣宗爲皇太孫時納胡氏爲妃及居東宮稱皇太子
妃宣宗登極爲皇后至三年十一月以無子多病表請
閑居而孝恭孫后代其位蓋孝恭旣誕英宗甫三月卽
已正位儲宮矣胡氏以正統八年薨於別宮尊爲靜慈

仙師又至天順七月上復下勅所司追復皇后尊稱諡曰恭讓誠順康穆靜慈加葺金山寢園但不立陵名不祔廟祀耳蓋英宗之達孝如此其時詔中有云於情於禮兩皆無憾真不誣也此與天順四年赦出建庶人文圭同一盛德。成化四年六月慈懿皇太后錢氏崩是爲孝莊后時孝肅周后正並尊恐他日不得祔葬裕陵乃脅上欲別擇地以葬慈懿賴輔臣彭時商輅禮臣姚夔等爭之始許錢后祔葬虛其右以待周后按姚夔之疏云或曰慈懿無子宜與恭讓同此又不然恭讓在宣宗時已遜位而立孝恭矣慈懿當時未嘗退處而別立

一后況宣宗晚年悔恨莫及曰此朕幼年事蓋可知矣
蓋其時詔孝肅者有引胡后以比後后故夔有是言然
則聖主舉動爲子孫取法不可不慎如此○宏治十七
年聖慈仁壽太皇太后崩卽孝肅后也上召輔臣劉健
李東陽謝遷賜對出裕陵圖以示則英宗隧道右壙相
通而左爲孝莊錢氏元官相去數丈中隔不通輔臣謝
不知上曰先生輩如何得知都是內官做的勾當又曰
內官有幾個識道理的昨見成化間彭時姚夔等章奏
先朝大臣忠厚爲國如此健等曰英宗遺命錢后合葬
大學士李賢記在閣下上曰遺命奈何違之東陽曰聞

當時尙有別議委曲至此非先帝意今日斷自聖衷勿
憚改作則天下臣民痛快上曰欽天監言恐動風水朕
以爲不然遷對曰陰陽拘忌不足信上曰朕已折之矣
今開壙合葬非動風水乎皇堂不通則天地否隔惟一
點誠心爲之料亦無害東陽健等力贊上曰此事不難
後事竟不行欽天監旣以爲歲殺在此內官監又謂事
干英廟陵寢難以輕動也以孝廟仁聖尙不能改已成
之誤當時內臣曲媚孝肅致英宗在天之靈終於不安
是時去孝莊祔葬已三十七年矣此事詳李文正廟對
錄中而孝宗實錄反不詳其祔廟事更出孝宗獨斷文

正輩不過將順而已

封妃異典

皇貴妃始於宣廟朝是固然矣然亦有異者如高皇帝
洪武十七年甲子册李氏爲皇淑妃又進封郭氏爲皇
寧妃而貴妃反不得皇字此其異也至文皇帝嬪御自
貴妃而下凡二十餘人無一得皇字者至宣宗孝恭后
後而皇字始專屬貴妃矣又如後宮姬侍列在魚貫者
一承天眷次日報名謝恩內廷卽以異禮待之主上亦
命鋪宮以待封拜列聖前後皆然惟世宗晚年西宮奉
元掖庭體例與大內稍異兼餌熱劑過多稍有屬意間

或非時御幸不能盡行冊拜於是有未封妃嬪之呼如
追封榮妃楊氏乃以宮人隨上遭火災而得追賁且諡
以恭淑安僖四字且祔葬於孝潔皇后之側此殊特之
典又前此未有者此後殆難盡紀然承恩歿沒者必加
封內僞以是外廷得聞逮龍馭上賓其現存未封者概
不得知矣聞之老內侍云世宗一日誦經運手擊磬偶
誤槌他處諸侍女皆頰首不敢仰惟一幼者失聲大笑
上注目顧之咸謂命在頃刻矣經輟後遂承更衣之寵
卽世所稱尙美人是也從此貴寵震天下時年僅十三
世宗已將耳順矣其後冊拜爲壽妃拜後百餘日而上

大漸說者歸罪壽妃微似漢成帝之趙昭儀云壽妃之薨在萬曆三十八年庚戌宮嬪承恩早而下世晚者近代少其比

帝后祔葬

本朝先帝大行山陵止一后祔葬直至英宗元配孝莊錢后崩時憲宗壓於生母孝肅周后幾不得祔葬裕陵大臣力諍之始虛孝肅元宮以待而二后並祔自此始矣憲宗初選吳氏旋廢則元配爲孝貞后王氏而孝宗生母爲孝穆后紀氏二后同祔茂陵蓋循用裕陵新例至嘉靖入繼則憲宗貴妃邵氏已稱壽安皇太后尋崩

初葬金山後亦遷祔茂陵於是三后並祔又從此始世宗元配爲孝潔后陳氏繼曰孝烈后方氏上以方氏有定爰衛護功其崩也梓宮先入永陵元宮又特祧仁宗以孝烈神主入太廟比穆宗登極遷孝潔梓宮與孝烈並祔而上生母爲孝恪后杜氏亦遷祔焉永陵亦有三后同穴一如茂陵故事矣今上孝祀兩宮他年千秋萬歲其並祔昭陵不待言惟太廟配享列朝以來止一帝一后嗣聖俱遵行舊禮不敢更也

廢后加禮

本朝廢后如恭讓胡后在天順間英宗已復位號矣惟

憲宗吳后立匝月而廢後以撫育孝宗稍得加禮至正
德四年薨于別宮輔臣李東陽等疏稱吳氏雖先朝所
斥而詔止云退居閑住無廢爲庶人之文宜稍加恩禮
上命如英廟惠妃王氏例歲時以素羞祭別所然惠妃
得諡端靜安和而吳竟缺諡號蓋以追稱窒礙也又后

兄瑛爲羽林衛指揮使於宏治間自陳臣職乃先世軍
功所遺不沾外戚恩澤乞升職改衛孝宗命陞都指揮
僉事改注錦衣衛而已當昭德貴妃謀螫儲皇吳氏保
護功實多而酬報之恩止此於義儉矣至嘉靖張后之
薨上命一依成化吳氏故事尋得旨改稱繼后視吳氏

稍優焉蓋吳之得罪以譴萬妃張之得罪以救張延齡皆一時微眚遂干天怒真不幸也

英宗重夫婦

周璟者先爲雲南左布政居妻喪未幾卽繼一室爲巡撫侍郎鄭辰所指摘問杖罪革職閑住矣至正統五年緣恩赦詔書自辨云律所載但有居父母及夫喪而私嫁娶者杖一百無妻喪嫁娶坐罪之條乞命廷議是非昭示天下上怒甚勒回不敘次年陝西參議戴弁任滿候代以妻喪及女亡輒歸都御史曹翼劾其奸惰不職弁乃自陳其故上曰此亦至情可矜姑貫其罪時大婚

未舉已重人倫之始如此又有都督同知馬良者少以
姿見幸于上與同臥起比自南城返正益厚遇之馴至
極品行幸必隨如韓嫣張放故事一日以妻亡在告久
未入直上出至內苑忽聞鼓樂之聲問之知良續婦又
知爲陽武侯之妹上怒曰奴薄心腸乃爾自此不復召
蓋聖德仁厚加以中宮錢后同憂患者積年伉儷情更
加篤摯因推及於臣妾真帝王盛節也○聞英宗爲太
上時錢后至手作女紅賣以供玉食今安昌侯錢氏宅
在城東英宗同孝莊后曾兩幸其第今正寢尚設有御
座錢后爲浙江之錢塘人與孝惠后邵氏同邑

英宗敬妃喪禮

英宗敬妃劉氏之薨距上升遐數月耳其喪禮皆上手定恩禮獨厚輟朝五日贈惠妃冊諡貞順懿恭一切祭葬之禮視文廟昭獻王貴妃有加焉他妃所不論也時劉氏雖久承恩然未有所出則上鍾情獨至矣次年正月上彌留之際召太子及太監牛玉等至御榻前口諭命太子百日後卽成婚次卽及皇后錢氏他日壽終須合葬惠妃亦須遷來蓋亦必欲祔葬山陵也少頃而上賓天矣蓋始終眷念劉氏如此其後成化四年孝莊太后崩時孝肅周后恐身後不得同穴至欲別葬孝莊于

他所賴閣臣彭時等及禮臣姚夔等六靜且述英宗遺命當時李賢曾紀于閣下憲宗始婉之孝肅得並入元宮而惠妃之得祔與否則未詳攷但人祀典載裕陵十八妃一葬綿山餘皆金山意者綿山爲劉妃乎○按太祖孝陵凡妃嬪四十人俱身殉從葬僅二人葬陵之東西蓋洪武中先歿者至太宗長陵則一六妃俱殉矣英宗獨見罷免此舉遂破千古迷謬視宗命孟才人先效死于生前者聖愚奚啻千里○嘉靖三十一年康妃杜氏薨逝禮臣奏循成化紀妃喪禮益杜爲穆宗生母而紀則孝宗所自出故引用之上不悅僅輟朝三日加

二字諡并無褒贈益見英宗之厚敬妃至矣

景帝廢后

成化十一年十二月上追復郕戾王仍舊帝號尋上諡曰恭仁康定景皇帝且致書于周王等各府詔告天下云請之聖母皇太后亦云出自先帝遺意不幸上賓未及舉行茲奉慈訓誕告在廷用成先志仍令有司修葺陵寢蓋是年十一月已立孝宗爲皇太子大赦海內上意欲追崇郕邸而難於赦書發之故特下詔以示崇奉亦首揆商文毅等苦心也但景帝繼后杭氏已于天順元年廢死而王妃汪氏故景帝元配正位中宮者四年

而後被廢睿皇復辟卽追復爲郕王妃現居郕邸何以
不并其位號復之耶況天順初廷臣以無罪廢汪后爲
王文于謙之罪見之彈章今王于旣雪而母后又返
正亦事理之未愜者汪妃至正德元年始薨乃上諡曰
貞惠安和景皇后云

景皇后壽考

本朝母后在位最久者憲宗孝貞后王氏五十五年孝
宗孝康后張氏亦五十五年王則皇后稱皇太后又稱
太皇太后張則皇后稱皇太后改稱伯母皇太后初無
貶降也惟景帝汪后以正統十年乙丑冊爲郕王妃十

四年景帝卽位立爲皇后景泰三年被廢天順元年復爲郕王妃至正德元年丙寅始薨后以丁未年生春秋恰八十追崇爲貞惠安和景皇后凡爲王妃者二次爲皇后者一次爲庶人者一次爲追贈母后者又一次凡歷五帝六朝前後六十二年升沉興廢更疊爲之終得與景皇同穴實前古未之聞

憲宗廢后

憲宗登極以天順八年七月廿一日冊立吳氏爲皇后已詔告天下矣至本年八月廿二日復下詔曰太監牛玉偏徇已私朦朧將先帝在時選退吳氏于聖母前奏

請立爲皇后吳氏言動輕浮禮度粗率略無敬慎之意
今廢斥吳氏退居別宮閒坐蓋中宮正位甫滿一月耳
又下詔云牛玉論罪本當處決念先帝時曾效微勞與
吳熹都饒死押發南京孝陵種菜后父都督同知俊成
登州子雄隨之至本年十月十二日又立王氏爲皇后
詔中謂先帝臨御之日嘗爲朕簡賢淑已定王氏育於
別宮以待期不意內臣牛玉云云蓋吳氏之得罪實由
萬妃受撻而讒之其禍遂不可解而王氏卽孝貞皇后
能委曲下之故得安于位在孝宗朝稱皇太后武宗朝
稱太皇太后加尊號曰慈聖康壽母儀兩朝壽過八十

夫豈偶然廢后吳氏至成化末年尙在西宮孝宗爲萬貴妃所忌賴吳氏保護以全至宏治初孝宗以吳后撫育恩命供給俱如后禮至正德四年正月十六日薨逝○按天順八年三月初八日皇太后聖諭皇帝婚期在邇必得賢淑爲配先時已常選擇尙慮有司遠忽禮部具榜曉諭京城內外大小官民之家素有家法女子年十五至十八者令其父母送來親閱時去睿皇升遐纔五旬而遽下此詔蓋宗祧之計重也此事在謝文正公宏治元年抗疏之前當時不以爲非至正德元年八月武宗大婚納孝靜皇后夏氏遂已備設六宮時去先帝

升遐亦甫踰年耳且聖齡止十六歲少于孝宗三年則謝已爲少傅次揆正受遺當軸不聞一語救正豈蹇諤于宮僚而循默于宰輔耶不可得而知矣○英宗大婚時年亦止十六

孝宗生母

東阿于穀峰

慎行

宗伯筆塵紀孝宗生母孝穆皇后紀

氏孕孝宗時爲萬貴妃所妬潛育西宮上不及知一日上見百官奏咄嗟歎憤太監懷恩奏萬歲有子在西宮已三歲上驚喜勅百官語狀召皇子紀妃泣曰兒去我不活矣皇子至遂賀頒詔天下移紀居東朝后尋賜死

或云自縊後萬妃曾召皇子食以有毒辭妃因忿不能語以致成疾此言似是而實不然按尹文和直瑣綴錄云紀后有娠萬妃恚而苦之上令托病處安樂堂以瘖報而屬門官照管旣誕皇子密令內侍謹護則憲宗設計潛養他所初非不知也又云甲午春悼恭太子亡後與彭先生談及請賜名付玉牒及冬乃托太監黃賜達之上上云果有一子在西宮俟再打聽按孝宗庚寅生至是已五歲矣不止三歲也又云太監張敏結萬妃主官太監段英乘間說貴妃妃驚曰何不令我知遂具服進賀厚賜紀氏母子次日下勅徙紀居西內永壽宮禮

數一視貴妃是時內臣乃黃賜等三人之功懷恩惟奉上命傳諭內閣耳而紀后遷西宮亦成禮未有遽稱不活之語亦不曾有進毒一事至次年乙未孝宗正位東宮至二十三年春則孝宗已年十八萬妃方薨距立太子時又十三年安得有忿不能語成疾之說也獨紀氏有病萬妃雖請以黃袍賜之俾得生見未幾而卒則此中曖昧殊薨事必有之所以孝宗登極後縣丞徐瑣等建言請追報母仇也惟此說爲稍實耳尹睿齋雖非賢者然此時正長禁林親履其事豈有謬悞于公起北方早貴并本朝紀載不盡寓目自謂得其說于今上初年

老中官不知宦寺傳言訛舛更甚于齊東予每聞此輩談朝家故事十無一實者最可笑也○尹錄所云彭先生蓋彭文憲時也時甲午年彭正當國而尹以讀學掌院與彭最厚故得進言尹所紀未免居功而情景則不謬云○商文毅公於成化十一年因悼恭太子薨上憂念甚知西宮有子六歲乃上疏略曰皇子聰明國本攸繫重以昭德貴妃撫育恩踰已出百官萬民皆謂貴妃賢哲近代所無但外議皇子生母因病別居久不得見人情事體未便伏望勅令就近居正皇子仍煩貴妃撫育庶朝夕便于接見按此疏孝宗之在西宮商公已頌

言於朝且歸美萬氏以頌寓規可謂苦心今塵史乃云
出自懷恩密奏想于公并文毅疏未之見耳○成化五
年柏賢妃生長子卽悼恭也大臣請告之天下上不許
蓋慮傷萬妃之心也至孝宗之生臣下不敢請命名無
怪其然先憲宗大婚時初選吳氏爲中宮柏氏與王氏
爲東西二宮迨吳氏廢退王氏代爲后止存柏妃一人
爲初婚三宮之一若孝穆本萬妃宮中人而萬妃又孝
肅侍女先以賜上者初未有位號故吳氏得而笞之后
以此廢○萬妃之始先入孝恭太后宮

萬貴妃

憲廟時萬貴妃專房異寵首揆萬文康至通譜稱從子而孝宗生母孝穆皇后紀氏噤不敢自明至六歲而左右言之始得見父皇命養于仁壽皇太后宮萬貴妃恚甚孝穆旋以暴薨報未逾年而孝皇亦旋正東宮之位矣以萬氏之專妬遂令孝穆不全而終不能有加于孝廟則宗社之靈憑之也萬氏豐豔有肌每上出遊必戎服佩刀侍立左右上每顧之輒爲色飛其後成化二十三年撻一宮婢怒極氣咽痰湧不復甦急以訃聞上不語久之但長歎曰萬侍長去了我亦將去矣于是悒悒無聊日以不豫至于上賓情之所鍾遂甘棄臣民不復

顧然婦人以纖柔爲主今萬氏反是而獲異眷亦猶玉環之受寵于明皇也晉傅咸傳云妹喜冠男子之冠桀亡天下晉書五行志謂男子履方頭女履圓頭至惠帝時女履亦如男子以爲賈南風專妬之應今萬氏女而男服亦身應之矣又武周垂拱二年雍州新豐縣有山湧出初僅六七尺漸高至三百尺因命改新豐爲慶山縣江陵人俞文俊上書謂太后女居男位反易剛柔致然成化十六年福建長樂縣地中突起一阜高三四尺人畜踐之輒陷尋又湧出一山廣袤五丈此見雙槐歲抄以爲男女易位之象蓋亦以屬萬氏之服妖云○萬

氏以成化二年丙戌封貴妃生皇長子將百日而薨未及命名至妃之薨則二十三年丁未想其年必非少艾矣而恩寵不衰亦猶今上之專眷鄭貴妃幾三十年也然萬氏戚里之封僅得錦衣秩雖漸進不離本衛今鄭氏不然並不敢援永樂之例以請文職蓋兩朝之恩厚而有節如此

謝韓二公論選妃

宏治元年太監郭鏞請選女子于宮中或諸王館以待上服闋册封二妃廣衍儲嗣左庶子謝遷諫止謂六宮當備而三年未終山陵未畢諒猶痛不宜遽及此事

焦泌陽秉史筆謂謝進此諛詞獻詔以悞孝宗繼嗣之不廣王弇州考悞中駁焦云此泌陽懟筆蓋陰刺中宮之擅夕而譏謝公之從臾時上聖齡甫十九中宮何以有擅夕之聲耶謝疏議甚正焦乃小人無忌憚耳此說固不謬然次年禮科右給事韓鼎又以皇嗣未廣爲憂上言古者天子一娶十二女以廣儲嗣重大本也今舍是弗圖乃信邪說徒建設齋醮以徼福不亦惑乎上感其言優詔答之次月鼎又言臣有立天下大本之言仰承溫詔今幾五十日而聖斷杳然伏望慎選良家以充六宮爲宗廟長久計上曰立大本之言誠有理但未宜

遽行耳按韓之疏正與謝牴牾但據韓疏細味之則是時中宮已擅寵專以祈禱爲求嗣法上雖是鼎言終不別廣恩澤蓋爲后所制也以故后自再舉蔚悼王後孝宗更無他子泌陽之譏謝文正誠屬無稽然而謝之爲聖孝計韓之爲宗祧慮俱憂國讜言未可偏廢也至宏治三年荆王見肅亦請上博選良家女以廣胤嗣而上終不從蓋中宮之擅夕已著聞于宗藩矣至宏治四年吏部聽選監生丁熾者又疏言內庭妃嬪之選上用諭德謝遷言而止所以保護聖躬者至矣今恐左右讒巧之人或以皇儲未建爲言移上初意乞慎終如始云云

是時去謝疏時已閱四歲且上亦從無采擇之詔其意不過迎合中宮結歡張氏爲進用地也然時武宗已在孕矣○歷朝大行山陵後凡生時嬪御已逝者及他日亡者俱得陪葬陵寢或近陵之金山歲時侑食於本陵之享殿俱得標名沾祭孝宗以前孝陵在南京高皇帝之葬帝后以下祔葬者妃嬪共四十人其在北葬天壽山者如太宗長陵則帝后以下有十六妃祔仁宗獻陵則帝后以下有七妃祔宣宗景陵帝后以下有八妃祔以上三陵俱主上升遐時殉節從葬者英宗裕陵帝后下有十八妃祔祭憲宗茂陵帝后下有十四妃祔祭其

後武宗康陵則二妃祔祭世宗永陵則妃三十人嬪二十六人祔祭以上四朝則先後薨逝不祔先帝山陵俱葬金山惟孝宗止有孝康皇后寶山雙峙卽泰陵祭祀更無一妃旁侍侑食蓋上自青宮婚後未幾登大位無論魚貫承恩卽尋常三宮亦不曾備以至於上仙真千古所無之事

鄭旺妖言

當宏治末年孝康皇后張氏擅寵六宮俱不得進御且自武宗生後正位東宮再舉蔚悼王薨後更無支子京師遂有浮言太子非真中宮出者時有武城尉軍餘鄭

旺有女入高通政家進內因結內侍劉山宣言其女今名鄭金蓮現在聖慈仁壽太皇太后周氏宮中實東宮生母也孝宗聞之大怒命殛劉山并鄭旺論斬後遇赦得免至正德二年十月又布前言同居人王璽擲入東安門且云欲奏國母見幽之狀武宗下之刑部再讞再不服久之始成獄正法此案倡議甚怪往年郭江夏行勘楚府時馮開之先生爲予言楚事因及武宗亦曾被謗如楚宗所言以此世宗尤追恨張太后并及鶴齡延齡兄弟決欲族之余謂不然此謗實始于鄭旺一時皆信之傳入各藩正德十四年寧王宸濠反逆移檄遠近

中有上以莒滅鄭太祖皇帝不血食之語蓋又因鄭旺之言而傅會之以實昭聖太后之罪耳○治世餘聞云鄭旺招係壩上人有女選入內近聞生有皇子見在太后宮每來西華門內臣劉林探問往來送時新瓜果入本宮使人黃女兒遞進回有衣服等物旺因誇耀鄉人稱爲鄭皇親已二三年被緝事衙門訪獲說者以爲有所受奉旨劉林便決了黃女兒送浣衣局鄭氏已發落了鄭旺且監着時謂行云發落意自可見若果妖言旺乃罪魁不卽加刑何也其案在刑部福建司至宏治十八年五月武宗登極大赦閔尙書珪放出蓋意亦有在

此當時目擊其事者所紀較國史更確其所謂有所受者指孝康皇后也旺罪魁不加刑者指孝宗知旺之冤也閔珪意有在者謂孝宗爲中宮所制其意實不欲殺旺也然則武宗果爲鄭金蓮所出而孝康攘爲嫡子耶抑更有他皇子也至正德二年則珪已罷去屠勳代爲司寇矣旺猶不平復理前說時孝康與武宗母子恩深豈有更改之理旺不死更何待哉若金蓮者則編修王贊教內侍書于司禮監親見其紅氍褕送浣衣局內臣皆起立迎入待之異常則旨中云發落者止與黃女兒同耳其後日處分則不可攷矣

頒行女訓

世宗以章聖太后所著女訓一卷示輔臣其首卽獻帝爲之序次卽太后自序爲目十有二已復以慈孝高皇傳及仁文皇后內訓同示欲與女訓並刊行輔臣張璠贊美請上御製跋語於後已奉旨允行矣次輔桂萼復獻諛謂女訓一書臣拜觀詳味知天啟中興聖賢繼出胚胎於此矣宜仿古胎教姪子及月將二南詩古詩編成簡明說詞選哲婦十餘人以備輪直凡中宮圖畫花鳥寓目之物尤當一一揀擇又令兩京布政司府州縣各修官女學設廟奉先代女師之神傍有廊爲習女工

之所中一堂爲聽教之堂選行義父老掌其事每年十月開學十二月止其教矇瞽之人以女訓一書教令講解背誦量與俸給提學官歲考閱之又欲選大家有家庭法之人爲媒氏凡女七歲以上入學習女訓者書其年月名籍令之收掌國有大嘉禮按籍而取之則太子必得聖女諸王及士大夫家亦有士行之女配矣次年之春芻卽以病去位尋卒于家○近年重刊呂氏閨範坤宮鄭妃作序擬其書仁孝后之女誠章聖后之女訓說者遂有僭偏之疑致啟大獄貽禍迄今未解是時不知何人視草不識忌諱乃爾

母后諡號

歷朝皇后諡號例用十二字諡中必有天聖二字而以虛字別之如高后之承天順聖是也蓋以匹耦至尊沒後仍存伉儷之體後世皆倣此至世宗朝追諡章聖太后乃曰安天誕聖獻皇后是直以篤生嗣皇見之微稱而沒其敵體先帝之實矣至同時加上高后諡改承天順聖爲成天育聖則又但以生文皇見重而助贊開天聖人置不論矣蓋其時世宗自謂應運中興功同文皇之靖難爲萬世不祧張本以故一時在事大臣政府則李文康夏文愍顧文康禮卿則嚴分宜但知逢迎上意

容悅固位而已宗廟大體彼豈暇顧哉

世宗廢后

世宗自孝潔崩逝甫踰月卽冊立順妃張氏爲后事在嘉靖七年至十二年之正月初六日忽下詔廢爲庶人時首揆張永嘉新從里居起再位首揆亦不能力諍而夏文愍爲宗伯最得上眷寂不聞一言卽臺諫亦無一人出疏諫止亦不以廢后罪狀告宗廟示天下但云不敬不遜侮肆不悛而已至今後學不解其故王弇州於本朝事極博獨於此事略之前輩如鄭端簡雷豐城時俱已立朝負史才所著書並不記涯略說者謂建昌侯

張延齡坐罪當死昭聖太后乞哀于廢后后乘新正侍
上宴微及其事上震怒立褫冠服鞭撻之斥譴以去本
月初八日卽下詔冊封德妃方氏爲皇后蓋聖心先定
久矣廢后事屬之建昌侯者其說似爲近之延齡橫于
孝宗朝至殺無辜污宮眷如文臣李夢陽內臣何文鼎
輩所奏真死有餘僂至是大臣力請寬延齡蓋恐昭聖
因此不豫致有他故以故延齡在獄十餘年而後棄市
時昭聖已升遐不及見矣此張永嘉方南海諸公力也
然十七年章聖服藥崩上疑昭聖爲巫蠱欲行大事非
李文康以死捍詔旨幾如唐宣宗之於郭太后矣昭聖

崩之次年卽有宮婢楊金英等謀弑大變使昭聖尙在
難乎免矣孝宗優假外戚反貽後殃所謂愛之適以害
之○張后以嘉靖十五年閏十二月初三日薨詔喪禮
視憲宗廢后吳氏例

皇后祔廟之禮

宗廟大事有以忠憤太過激成莫解之禍者無如嘉靖
初之議大禮若微言至理導人以不得不從者無如成
化初孝莊太后之議祔葬夫葬嫡后於他所誠爲悖謬
當時彭時商輅姚夔諸大臣回天之力固偉矣然禮卿
姚文敏疏中云慈懿葬于左皇太后萬年後葬于右慈

懿今日祔于廟皇太后他日亦祔于廟同尊並列毫無
低昂其詞甚婉故孝肅曲意勉從又三十七年而爲孝
宗宏治之甲子孝肅始崩則洛陽長沙餘姚在閣矣孝
宗以本朝雖未有此事然二后合葬爲非禮因元宮先
就無可奈何遂仍舊貫然此後孝貞王后得與憲宗同
穴而孝穆紀后先亡僅得祔葬則孝宗恪遵古禮嫡庶
昭然不敢踰尺寸何其仁而斷耶至于祔廟一事劉健
等尙祖姚夔舊說引唐宋二后三后並尊舊事以待上
之自裁而上乃曰祖宗以來惟一帝一后今若並祔乃
從朕壞起況孝穆爲朕生母尙祀於奉慈殿又有事須

師古末世鄙褻不足學之語健等始稱誦贊決而耐廟之議遂定果止孝貞合葬茂陵且與憲宗同入太廟而孝穆耐葬別祀于是一帝一后永爲後世法矣其後世宗議大禮非有孝宗故事在前則孝惠邵后亦必入耐太廟與憲宗同享蒸嘗而孝穆紀后見撥于外矣孝宗之爲孝豈非千古一人哉最後世宗先耐孝烈后寧非祧仁宗而不恤者亦以一帝一后成規已定恐他日身所並食者不爲孝烈而爲元配之孝潔故預爲之謀其心苦矣孰知聖子神孫他日定當補救匡正安肯違禮拂經以成先帝之過舉耶

孝烈附廟

孝烈既以擁護聖躬大獲殊眷其父安平伯方銳亦進封侯二十六年孝烈崩上欲升附太廟久之廷議不決上自出容斷竟祧仁宗附孝烈神主于廟時分宜當國固不足言而華亭新拜宗伯亦僅一執奏繼奉嚴旨卽唯諾從事矣此事關宗廟最大而廷臣無有以死諍者此時去議大禮時已二十餘年當時批鱗諸臣死者無算卽幸存亦流落荒裔朝士但羨張桂諸人之驟貴其貶竄者無一收召遂不復能執古誼力爭使聖主有此過舉良可惋歎至於孝烈梓宮亦開上壽宮隧道納之

元宮尤不愜人情蓋先世賢主如南宋文帝之于袁后
唐太宗之于長孫后亦以先亡歸陵寢他日帝反祔葬
焉本朝惟孝陵長陵母后先葬此後累朝皆別葬他所
及上升遐始遷后祔葬于典禮甚合況孝潔爲上元配
尙瘞襖兒峪而孝烈爲第三后乃先居上壽宮更覺失
序至隆慶初年孝潔仍祔世宗室而孝烈神主遷置於
奉先殿補救折衷咸歸穆宗達孝云○按隆慶初元加
孝烈諡號有祇天畏聖字面蓋亦著當時弭變之功也
然嘉靖三十五年已從元門法加孝烈爲九天金闕玉
堂輔聖天后掌仙妙化元君則先有輔聖之語矣

母后減諡

嘉靖十四年正月武廟后莊肅夏氏崩時張孚敬爲首
揆議以夏后與他后不同其諡號只可二字多亦不過
四字蓋用景帝廢后汪氏貞惠安和四字故事也時汪
鉉亦助孚敬謂只可二字李時謂可八字惟禮卿夏
言謂宜如故事仍爲十二字都御史王廷相吏部侍郎
霍韜亦同夏言所議上命定爲八字次年四月上幸天
壽山坐行宮召大臣曰莊肅之諡未安仍宜循舊至九
月乃進今諡時孚敬已去位矣世宗聖意何曾菲薄夏
后乃永嘉素工揣摩初爲異議其罪豈止逢君之惡而

汪鉉則又逢相之惡時貴溪南海皆以議禮驟貴猶能
持正不阿如此今諛永嘉相業者大抵多溢美則江陵
公秉史筆時以聲氣相附每追頌其功也

莊肅后喪禮

嘉靖十四年正月武宗莊肅夏后崩禮臣上儀注擬上
素冠服舉哀及羣臣行奉慰禮上曰朕於皇兄后無服
制又迫聖母壽誕朕當青服視事于是禮臣改請皇上
服制既絕不必舉哀臣下亦不必奉慰越七日卽爲章
聖太后壽誕上命百官不必赴衙門但於私第盡制蓋
視羣情也輔臣孚敬等言聖母聖誕吉禮重大宜吉服

終日上始悅而許之然數日前元旦以憲廟恭妃初喪免文武百官慶賀矣且莊肅於世宗爲同堂從嫂祖宗亦服總麻乃上曰無服禮臣亦曰服絕不得其解時貴溪長禮部

嘉靖兩后喪禮

世宗初年以議大禮得伸志於興邸兩親其後尊禮靡所不及從此遂親定典制厚薄任情其於喪禮最減殺者則昭聖太后最隆重者則孝烈皇后而極矣嘉靖二十年昭聖崩上諭禮部昭聖雖稱伯母朕事之敬慎自十七年秋事不得不自防愛以愛宗社朕故不敢躬詣

問安今崩朝夕奠祭令內侍官代行蓋上意猶謂戊戌
草聖之逝皆昭聖肆毒不止如始所疑潛行巫蠱已也
至二十七年孝烈后崩上以壬寅內變后有大功命喪
以元配禮未踰月卽定陵名曰永陵命先葬元宮則二
祖以後所未有也且元配孝潔尙別厝而第三后先入
陵寢尤亘古所無至大祥遂欲耐廟輔臣嵩請耐于皇
妣之次上怒以爲是爭考爭皇之故智不許至再期竟
祧仁宗而以孝烈先入廟則古今初見時上恚初議未
卽許祧乃于忌日請祭疏中批旨云孝烈所配者入繼
之君又非六禮之始忌日卽不祭亦可部臣益惶懼將

順恐後至引本朝宣廟拾恭讓后而耐孝恭憲廟捨吳
后而耐孝貞爲比以媚聖意上始悅許之時宗伯爲徐
華亭豈不知讓后以病退別居盡謝位號吳后立甫一
月廢斥還宮久不母儀天下豈孝潔可比乃曲筆詭詞
至此卽得世宗愉快寵眷一時其如後世議者何○先
是嘉靖七年孝潔陳后崩靈輿赴山陵時上命出左門
言官及禮臣再三請謂宜出正門終不許至孝烈梓宮
當葬期禮部儀注竟擬正門中道出蓋已預揣上意矣
○景泰七年孝肅后崩亦先入太廟然而不祧祖宗蓋
廟室未滿也

母后先加廟

世宗既追崇加廟皇帝矣至中葉又納諛臣言耐獻皇於太廟稱宗臣下畏禍自侍郎唐胄之外無復敢繼起者上追忿往事謂近代爲不足法及孝烈皇后崩已先納梓宮于上所營壽宮矣及小祥遂下詔欲奉神主入耐廟時宗伯費文通依違未果比釋服則有徐文貞爲禮卿僅婉辭以爲此聖子神孫之事上遂大怒而禮科都給事顏思忠復執部議以諫內旨因他事杖一百爲民而孝烈入廟仁宗祧矣按洪武十五年孝慈皇后崩次月葬鍾山之陽定其名曰孝陵至太祖升遐合葬焉

蓋用唐太宗昭陵故事是亦國初未定之制也至永樂五年仁孝皇后崩文皇聖意已不欲立封域於南方故遲遲未葬至七年幸北京始得地於昌平縣用江西術士廖均卿議改封黃土山爲天壽山十年遷仁孝后梓宮北行安葬因定陵名曰長陵蓋三千里輜車遠涉無暫寔他所之理已非太祖時比矣此後累朝不復遵此制惟景泰七年廢后杭氏薨卽懷獻太子母也帝諡爲孝肅皇后先歸山陵因耐太廟此爲古來僅見之事蓋自未入廟乃令宮闈先侍祖宗于典制甚悖而陳王諸輔臣不能救正識者非之比英宗復辟禮臣胡濙始以

爲言上命遷后主於別室時景帝違豫未大漸也未幾襄王瞻墀入朝謁陵回奏稱景陵明樓未建而杭氏所葬明樓高聳與長獻二陵相等乞毀之上命如議然而陵名固尙未立又未幾帝與后俱廢矣世宗薄視累朝動以二祖爲法以故臣下所建白無一轉圜然耐廟一事肇自景帝何足遵守且尋遭廢斥不祥之甚惜當時無有以此密諷於上者又孝烈之葬先定名曰永陵亦用二祖故事方孝烈初崩踰月順天府進春例當並進而中宮已虛上命仍進几筵府官用吉服從事亦上所親定也○葬孝烈時上命居元宮之左而虛其右以待

元配孝潔合葬未幾又命孝烈復葬右云○世宗之命
追眷故后蓋用宋仁宗温成后故事后薨未久會立春
后閣已虛詞臣不復進帖子詞帝命仍進禹玉代歐陽
公口占爲詞卽所謂花似玉容長不老只應春色勝人
間者是也

親蠶禮

世宗更定祀典遂行皇后親蠶禮當時俱咎夏貴溪逢
迎上意御史馮恩至謂后親蠶于郊不可示後世然夏
說未可非也周禮天官內宰中春詔后率內外命婦始
祭蠶於北郊漢禮儀志皇后祠先蠶以中牢文帝景帝

元帝俱詔皇后親蠶魏黃初中依周禮置壇于北郊晉
與高齊俱置高壇皇后親祭俱躬蠶後周因之隋置壇
宮北三里皇后以太牢祭唐置壇在長安宮西苑中貞
觀顯慶先天乾元間皇后親蠶皆先有事于先蠶壇儀
具開元禮宋用高齊制后親享先蠶貴妃亞獻昭儀終
獻其神則祠天駟星次則黃帝元妃西陵氏漢加苑苑
婦人寓氏公主後又益以蠶女馬頭娘之屬皆有所本
嘉靖之制雖未盡合古然農桑並舉固帝王所重

李氏再貢女

嘉靖十四年十一月詔選淑女有河南延津人李拱宸

獻其女上以長至在邇而女適至大喜之是月十九日
慶成宴畢卽令東華門入不必擇日賜洪宸錦幣宴于
光祿寺次年二月卽拜其女爲敬嬪拱宸爲錦衣正千
戶至二十四年九月拱宸之子應時又以拱宸之次女
爲獻禮部請日未報至十一月始得旨以冬至慶成宴
自東華門入賞賜供宴如其父其事俱同昭陽二趙但
相距十年爲異耳

聖母並尊

唐宋人主爲妃嬪所出者御極以後尊后爲太后而進
所生母爲皇太妃雖恩禮無異而嫡庶尙分也至後唐

莊宗以嫡母爲太妃而以生母爲太后冠履倒置蓋胡
虜不學使然真貽笑千古我朝列帝非后出者比臨御
時多不並存惟景帝初登極尊皇太后孫氏爲上聖太
后生母賢妃吳氏爲皇太后憲宗初元則孝莊與孝肅
並以天下養于是尊皇后錢氏爲慈懿皇太后貴妃周
氏亦爲皇太后而無尊號以稍別等威識者尙尤其過
直至隆慶六年今上六月卽位甫六日而高新鄭見逐
江陵奉上面諭欲並尊兩宮且於生母皇貴妃更加二
字徽號蓋故反其詞以遏止閣臣使不得執奏也於是
江陵與禮臣議兩宮並進爲皇太后而於嫡母陳加仁

聖生母李加慈聖各二字徽號而體貌俱無少別矣時江陵公方欲內詔慈聖以爲固權地苟可異禮何所不至而議者責以不力諫誤矣歷朝以來臣下嫡母在堂者生母不得封卽生母歿亦不得丁憂其自愛者不過給假治喪今三母並封登之令甲而所生卽媵婢亦得盡三年之哀此固君父曠蕩之恩錫類所及顧欲使人主自斲於所生當亦非人臣所安也。按新鄭逐時內臣捧詔旨出其首云皇后懿旨皇貴妃令旨皇帝聖旨云云是時己三宮並列矣踰月始舉並尊聖母之典又安能止勿行也

兩宮同在位久

今上嫡母曰仁聖皇太后生母曰慈聖皇太后當上御極之初卽已並尊如成化初年故事但當時中宮錢氏進稱慈懿皇太后而孝肅止崇爲皇太后尙有等差不如今上同加尊號情禮並申之爲愉快又錢后稱太后止五年而仁聖享孝養者二十五年且初登長樂時與慈聖父母俱存兩宮聖母尙修家人之敬俾得通籍禁中尤爲亘古未有之福今慈聖遐齡正未可量恐又非孝肅周后所能企耳

今上篤厚中宮

自丙申兩宮災後上移居毓德宮既而又移啟祥宮其宮本未央宮興獻帝誕生此中世廟以美名冠之後改今名自今上移蹕後惟翊坤鄭貴妃及他寵嬪侍左右中宮不復得時奉譙閒至庚子之冬京師盛傳中宮久病侍衛不過數人其膳修服御俱爲主上裁減大半抑鬱成疾漸瀕危殆都下貴賤長幼皆信之蓋其時已傳旨修東宮次第冊立未幾遂有此謗疑上且頓抑中宮使之不全以爲次子奪嫡之地大小臣工俱憂駭莫敢發時工科都給事中王德完新自家居補官至都始露章力諫其辭哀婉而危切上大怒下詔獄拷訊究問主

便之人九卿臺省俱力救不從時首揆久謝病次輔沈
一貫以密揭婉解次日忽下聖諭云中宮乃聖母選擇
元配見今同居一宮少有過失豈不優容邇年稍稍悍
戾不慈朕每事教訓務全婦道中宮亦知改悟何嘗有
疾云云輔臣回奏不報一貫又上奏謂今日之謗十年
前已鼎沸故上前諭惟示首臣不使一人得見若以此
諭外傳外人必謂上果不利於中宮則數年之謗本虛
而反以爲實上數年之旨本實而反以爲虛天下藩府
以至萬國四夷歲進表牋稱賀中宮倘聞此語尤爲未
便其他語尤過激難堪上稍爲霽威且示以皇長子冊

立稍遲之故并寢所傳聖諭不下德完雖廷杖削籍亦得免於死上重彝倫畏名義卽簡禮中宮或亦一時拂意致然忽聞中外浮言諫臣伏闕遂不勝媿悔此後佞儂彌篤恩禮有加次年卽特旨建儲人心大定去冬彌天疑謗一旦冰釋給事虞淵取日功真不世而閣臣犯顏苦口甘犯天威其善亦未可沒也

恭妃進封

本朝貴妃之加皇字也自孝恭始也孝恭旣以誕元子進封未幾元良正位卽代讓后居尊此雖先朝故事非可爲訓迨今上連舉聖嗣今東宮生母初止封恭妃而

德妃鄭氏乃特加皇貴妃且皇第二子年止四歲以故
孫如法姜應麟輩曹起力諫亦懼他日有包藏禍心妄
援孝恭以希橫恩者爲慮雖遠不知聖主乾斷非臣下
所能蠡測其時姑假名號以慰翼坤而長幼之序久已
定矣皇貴妃之體鄰于正嫡凡禁中大慶奉請兩宮則
中宮奉侍仁聖而翼坤奉侍慈聖得並講姑媳之體他
貴嬪皆退避不敢望見卽今太子册立以後恭妃執禮
猶謙亦掖廷舊制使然時臣下雖懣憤而不敢請直至
元孫誕生上大需中外恭加慈聖徽號至十二字而恭
妃進封爲皇貴妃錫以金册金寶自此禮儀體貌一視

翼坤並列左右天下始快然無遺憾而聖心至是大白
蓋主上於定名正分究竟無爽云

郊寺保釐

今上專寵鄭貴妃固累朝所少因有疑福王懷奪宗之
計者不知上神斷素定非昔庸主溺衽席者比但侍婢
左貂之徒未免妄測以冀非常卽稱謂間不無踰僭猶
記向游郊外一寺亦勅建者壯麗特甚登殿禮佛見供
几上並列三位中曰當今皇帝萬歲景命左曰坤寧宮
萬歲景命右曰翊坤宮萬歲景命翊坤則鄭妃所處宮
也予爲吐舌駭汗諷主僧易之不知能從與否此蓋彼

宮位下大璫所爲時福邸之國已久而不免並嫡之嫌矣因思昔年王都諫德完一疏有功宗社不細

今上家法

今上眷鄭貴妃幾於憲宗之萬貴妃矣然禮遇雖隆而防維則甚峻有內臣史賓者以善書能詩文知名干內廷其人已貴顯蟒玉侍御前久矣一日文書房缺員上偶指賓以爲可補此缺貴妃從旁力贊助之上震怒笞賓逐之南京貴妃戰慄待罪久而始釋史居南十餘年始再召入卽外廷大臣如寧陵呂司寇撰閨範一書貴妃作序重刻其後呂爲言官所糾直指此事爲交結宮

閣上下旨謂此書本係御賜非出私獻衆疑始稍解蓋此書未必曾人御覽卽入覽亦必不命重發梓聞上初見彈呂疏等意甚不懌特以貴妃故有投鼠之忌姑云御賜以杜衆口塞浮誘耳呂未幾卽去位累薦未召蓋聖明英察每多意外之防如此

東宮妃號

萬曆丙午春三月上以皇太子第一子生其生母爲欽命選侍王氏未有封號命內閣及禮部擬議進呈初擬皇太子嬪不允又擬皇太子夫人亦不當聖意乃下聖諭進封爲才人且賜閣部皇明典禮各一部書內皇太

子正妃封妃次皆拜才人開載甚明上命存留備考時
揆地爲四明歸德山陰而署部則侍郎李晉江也諸公
皆大儒不宜踈陋至此然典禮亦非僻書館閣名公亦
宜家置一帙而待欽賜耶按漢太子宫中自妃而下有
良娣有孺子凡三等晉惠帝在東宮謝才人生子適進
拜淑媛俱載在史而此後蓋不勝紀諸公何不詳考具
奏而以臆對知不滿聖主一哂耳

王妃殉節

壬辰年寧夏兵變慶王新立爲賊所脅屈節馴服不待
言憲王之正妃方氏者繼冊甫一年卽發居矣逆賊哮

承恩逼之欲行非禮妃乃抱世子匿於土窖時賊怒搜捕苛急驚悸薨逝管理府事鎮原王仲雖以其事上聞上惻然傷之差官慰問未幾又報妃實以本年四月初一日守節自縊上曰妃貞烈可嘉宜加褒卹以風示天下命禮部從厚議卹來言蓋妃之義不受汙事狀必非僞而死於穴處與死於雉經終莫能明朝議亦不深核第遵明旨錫殊典而已其後事平亦更無實錄倘彼中將吏功罪亦貿貿如此何以定誅賞耶

宮人姓名

本朝宮女命名最不典雅如世宗壬寅宮婢逆案其名

俱蓮菊蘭荷之屬與外間粗婢命名無異然而出外則不然只如遣出監公主駙馬府者則聯其父之姓名如趙甲則云趙甲女錢乙則云錢乙女之類是也偶閱宋周平園襟記其爲翰林學士時淳熙三年內中夫人悞傳鎖院次日御批出典字直筆吳庭慶降充紫霞帔主管大內宮事慶國淑懿夫人劉從信降兩字夫人其名與朝士無異

文臣賜官婢

太祖賜右丞相汪廣洋死時汪謫南海已在舟中使至之日汪奉詔自經有一妾從死使者以聞上訪其人則

故陳知縣之女以罪謫爲官婢上怒曰凡沒官子女例發功臣爲奴從無與文臣者因勅法司治罪事在洪武十二年之十二月其時上疑宰相胡惟庸與六部大臣共廣洋爲奸次年正月惟庸卽謀叛滅族六卿或死或竄無一留者蓋官婢之重如此